

# E Kriminal Por Bandoná Krímen?

Mayoria krimen ta kometé pa hende ku ta hasi aktonan ilegal ripitidamente. Si polis ta logra gara nan, eventualmente nan lo ta bèk riba kaya...i tras di trali atrobe. Dentro di tres aña, 60 te 70% di esnan ku ta haña libertat di prizòn lo ser arestá pasobra nan a bolbe kometé un akto ilegal.

Esei ke men ku si e detenido ta kambia durante su enkarselashon, por kibra e siklo di delito-detenshon, i prevení sentenarnan di krimen.

Ma prizòn no ta konosí komo un lugá di transformashon positivo. Un presu a deskribí prizòn komo un lugá: "unda violensia i droga ta un okurensia diario." Den prizòn, detenidonan pasífiko sa bira kriminalnan violento. I ora nan ta sali, detenidonan ta mihó eduká den métodonan mas sofistiká pa kometé krimen. Kiku por ser hasí pa produsí cambio positivo den e detenido?

Pa nos sistema penal por produsí suidananan produktivo, nos mester kuminsá mira prizòn komo un sentro di formashon. Pa esnan ku ta adikto di droga, e kas di detenshon por proveé yudansa. Edukashon tambe ta nesario. Na nos isla, 78% di esnan será no a kaba skol. Awor tin plan pa duna lès na presunan, tantu lèsnan teorétiko komo di ofishi, un stap den un bon direkshon. Si e detenidonan por partisipá den kursonan edukashonal i vokashonal, nan lo tin mihó chèn pa haña lugá riba e merkado laboral ora nan ta sali. Un industria den prizòn tambe lo kontribuí na e formashon di e "huespet" penal.

E presu tin mester di yudansa ora e ta haña su libertat, pa yud'é kambia. Hopi bes durante su enkarselashon, e detenido su amigunan i famia ta bandon'é, e ta pèrdè abilidad pa ku su ofishi. Despues di un estadia prolongá, ta difísil p'é adaptá na bida liber. E promé seis lunanan ta esepialmente difísil, buskando trabou, reibeweis, kas, èts. E tin mester di yudansa praktikó. Hopi detenido ku no a haña e sosten aki a kai bèk den krimen simplemente pasobra esei ta e úniko bida ku nan konosé, e úniko abilidad ku nan tin.

Ma ningun programa por ta efektivo sin edukashon moral. Krímen ta prinsipalmente un rechaso di balornan i moralidat i pues un problema moral.

E medida mas potente kontra kriminalidat no ta forsa brutu ku outoridatnan por ehersé. E ta mas bien un cambio interno den e kriminal mes, un konsenshi reaktivá, basá riba balornan. P'esei un programa di formashon pa detenidonan ku no tin balornan i moralidat komo e fundeshi lo produsí solamente **kriminalnan mihó eduká!**

Ma pakiku mester warda pa bo yu ser enkarselá pa e por haña sa kiku ta bon i kiku ta malu? Formashon moral mester kuminsá den kuna, i ta un parti integral di su edukashon na kas. E mester ta fundamental pa skol básiko i sigui na skol sekundario. Mayornan, dosentenan, i pastornan ku no tin tempu pa instrukshon moral ta kontribuí na kriminalidat den nos komunidad!

Ma formashon moral, tantu di presunan komo di muchanan inosente, no por ta isolá for di Dios. Feodor Dostoyevsky, den su buki klasiko, *E Rumanan Karamazov* a konta di un debate entre tres ruman. Esun mas chikitu tabata un pastor, i esun mas grandi un malbado. E di dos ruman, Ivan, ta deklará e bèrdat teribel: "Si no tin Dios, tur kos ta pèrmisibel. Krímen ta inevitabel."

Nos ta **menta** nòmber di Dios i Hesus tur dia. Ma nos ta **biba** komo sifuera Dios i Su leinan ta irelevante pa ku nos bidanan. Nos a bandoná balornan ku El a preskribí. Segun Beibel, esun ku ta moralmente "bobo a bisa den su kurason: 'No tin Dios!'" (Salmo 14:1). Ma pa ignorá Dios no ta kambia e echu ku tin konsekuensia si nos violá Su leinan.

Kriminalidat ta refelhá un frakaso di konsenshi, frakaso di famia, frakaso di skol, frakaso di komunidad. Ma edukashon moral i spiritual, basá riba instrukshon sanu di Palabra di Dios, por produsí un reformashon moral interno den e kriminal ku lo resultá den un bida transformá! "Si algun hende ta den Kristu, ta un kriatura nobo e ta. Loke ta bieu a pasa kaba, i ata tur kos a bira nobo" (2 Korintionan 5:17). Beibel tin e kontesta pa e problema di kriminalidat i Dios tin e poder pa transformá e kriminal!